

প্রেমহীন পৃথিবীর কাব্য

ডঃ মোহাম্মদ আবদুর রায়যাক

প্রেমের কবিতা আজ বড় জলো লাগে -
একুশ শতকে এ পৃথিবী প্রেমহীন;
শ্বেত পারাবত আজ বিনিদ্র জাগে-
ডানাহারা সে যে কেঁদে মরে নিশিদিন ।

জোৎস্না হসিত রাত কাটে নিঘুম,
ফুটপাথে শোয়া মানুষেরা চোখে ভাসে -
উদাস দুপুরে চরাচর নিবুম,
এ পোড়া শ্রবণে দুঃখীর কান্না আসে ।

পালা-পার্বণে, আনন্দ উৎসবে
মেতে ওঠে সবে, আমি দূরে সরে রই;
হৃদয় গভীরে, একান্ত অনুভবে
বুঝিনা কেন যে এক বুক ব্যথা বই ।

মেঘমল্লার শূনিয়া মেঘের ডাকে
এসিড বৃষ্টি নামবে সে ভয় হয়;
ভয়ে পথ চলি, চেনা পথটির বাঁকে
কে জানে কিভাবে ঘটে প্রাণ সংশয় ।

যে ভুবন ছিল একদিন বড়ো চেনা
আজ সে পৃথিবী কোথায় নির্বাসিত ?
সুরের ভুবনে আজকে অসুর সেনা;
পদে পদে করে মানবতা লাঞ্ছিত ।

মানুষেরই বেশে হিংস্র স্বাপদ কিছু
কেঁড়ে মানুষের বাঁচবার অধিকার,
লেলিয়ে দিয়েছে মৃত্যু তাদের পিছু-
ভেঙ্গেছে তাদের স্বপ্নের সংসার ।

আজ প্রেমহীন পৃথিবীর পথে পথে
প্রতি পলে পলে জীবনের পরাজয়;
সভ্যতা আজ চলেছে উলটো রথে
কে শোনাবে আজ মানুষকে বরাভয় ?

সিডনী, জানুয়ারী ৫, ২০০৫